



Team 12 aña y menos di Synchro a titula

Campeon na CCCAN

DIARAZON anochi siman pasa, famia y conocirnan a bin hunto na Aeropuerto p'asina ricibi nos ekipo Nacional di Landamento Sincroniza. E hobencitanan aki a representa Aruba durante e competencianan di landamento Sincroniza n'e Campeonato CCCAN. Esaki a tuma lugar na Barbados. Aruba a participa solamente den e categoria di 12 aña y menos, y den e categoria aki tabatin mas pais cu a competi, esta Curacao, Republica Dominicana, Jamaica, Barbados y Aruba mes.

Nos muchanan a prepera durante algun luna caba y bou guia di ambos coach Alva, y Yami, nan a sa di konkista e titulo di "Overall Champion 12 and under". Aruba a participa den 4 evento, esta e figuranan obligatorio cu tur atleta ta haci, Solo, Duo y Ekipo.

Banda di e competencia di team, Aruba a participa tambe cu rutina di solo y duet. E resultado ta como lo siguiente: Den e evento di Figuranan, Janelly Piña a sali na di dos lugar, pues a ricibi e medaya di plata. Den categoria di Solo, Janelly Piña a konkista e prome lugar y a ricibi su medaya di oro. Den categoria Duo, Aruba a participa cu Janelly Piña hunto cu Sarah Silva. E duet a sa di konkista e di dos lugar y nan a ricibi nan medaya di plata. Den e evento di Ekipo Aruba un biaha mas tabata briya y a sa di gana e medaya di oro. Na cada atleta, ta bay palabranan di pabien y tambe exito den futuro.

Na mes momento nos kier a manda palabra di exito pa nos seleccion Senior di Aruba. Nan ta sali diasabra ultimo, rumbo Toronto, Canada pa participa n'e Weganan PANAM. Por sigi e atletanan aki via e Facebook pagina di "Barracudas"!

